

TEZĂUR LITURGIC

7 IANUARIE

ACATISTUL

SF. PROROC

IOAN

**BOTEZĂTORUL,
ÎNAINTEMERGĂTORUL
DOMNULUI**



TBILISI, 2000



დაუჯდომელი საგალობელი წმიდისა

წინაისწარმეტყუელისა, წინამორბედისა და უფლის

ნათლისმცემლისა იოანესი

კონდაკი 1

ღმრთივმომადლებულო წინაისწარმეტყუელო და ფიცხელითა მით მოსაგრეობითა შენითა ცათა მიმართ აღსწრაფებულო, რომელსაცა საცნაურნი იგი ნაყოფნი სულისანი წარმოგიტევებიეს, მთავარანგელოზისა მის გაბრიელისა ხარებისა მართალთა მშობელთა მათ შენთა თანა მედღესასწაულენი, შენ, ყოველთა ნაშობთა უპირატესად წოდებულსა და სინანულისა ნათლისღებისა განმაწესებელსა, ესრეთ გმეტყველებთ: გიხაროდენ, იესუსა მაცხოვანებელისა მის გზისა განმამზადებელო და ყოველთა მათ დიდთა წინაისწარმეტყუელთა უზეშთაესო, წინამორბედო და ნათლისმცემელო უფლისაო იოანე!

იკოსი 1

საღმრთოითა მით განგებულებითა წარმოვლინებულო, რომელმან სამოთხით განვარდნილნი დაბადებულნი დამზადებელსა შეაწყნარენ, შენ, სულისა წმიდისა მიერ აქმულსა და სულიერისა მის ცისკრისა მთიებსა განსაკრთომელსა, ესრეთ გიგალობთ:

გიხაროდენ, ქრისტესა ბეჭდითა მით უქმნელითა
აღბეჭდულო;
გიხაროდენ, ღმრთისა მიერო ნათელო აღმომდინარეო;
გიხაროდენ, წინაისწარმეტყუელო განსაკვირვებელო;
გიხაროდენ, ჩუენისა ყინულქმნილისა გულისა
ცეცხლო განმატფობელო;
გიხაროდენ, სავანეო მიუთხრობელო;
გიხაროდენ, საღმრთოითა მადლითა აგზებულო;
გიხაროდენ, მცენარეთა ნაყოფთმჩინებელო;
გიხაროდენ, განხმულთა შტოთა აღყუავილებაო;
გიხაროდენ, ამა სოფლით მოწამეობითა მით
ღმრთივსათნოითა განსრულო;
გიხაროდენ, რამეთუ წინაისწარ ხედავ უფალსა შენსა
წინაშე შენსა მარადის;
გიხაროდენ, რამეთუ ქრისტე მარჯულ შენსა არს;
გიხაროდენ, იესუსა მაცხოვრებელისა მის გზისა
განმამზადებელო და ყო-ველთა მათ დიდთა
წინაისწარმეტყუელთა უზემთაესო, წინამორბედო და
ნათლისმცემელო უფლისაო იოანე!

კონდაკი 2

ელისაბედისა ბერწობისა აღყუავილებაო და ზაქარიას
მოლოდებისა კეთილალსრულებაო, ბევრეულთა მათ
უსასოქმნილთა სასოებად აღმადგინებელსა შეგითხზავ
ქებასა ამას: ალილოუია.

იკოსი 2

ღმრთისაგან ელიას სულითა აღმოტევებულო და ქრისტესმიერისა მის სარწმუნოებისა მდულარებაო, რომელი მუცელსა შინა დედისა შენისასა ხმოვანებითა მით ღმრთისმშობელისაითა ზეცად აღტრფობილი სიხარულითა ჰკრთებოდნი, შენ, სულისა ჩუენისა საწერელსა წარუშლელსა, ესრეთ გადიდებთ:

გიხაროდენ, ანგელოზთა თანამზრახველო;

გიხაროდენ, ღმრთისა სახიერებისა თანაშეტყვებულო;

გიხაროდენ, მხცოვანთა სიწმიდეო;

გიხაროდენ, ჭაბუკთა განმხნობაო;

გიხაროდენ, ჩუილთა საქებელო;

გიხაროდენ, შესვენებულთა სასოებაო;

გიხაროდენ, დაბადებიდთაგანთა სამღერელო;

გიხაროდენ, ცხოველთა ნუგეშინისმცემელო;

გიხაროდენ, სულთა ამათ ჩუენთა უდებთა

მხუმილველო მიურულებელო;

გიხაროდენ, ღმერთით მოქადულო;

გიხაროდენ, რამეთუ შენითა ღუაწლითა ღმრთისა

წინააღმდგომნი საცინელ იქმნენ;

გიხაროდენ, რამეთუ მეგობარნი ქრისტესნი შენისა

ღუაწლისათვის მუსიკობენ;

გიხაროდენ, იესუსა მაცხოვრებელისა მის გზისა

განმამზადებელო და ყოველთა მათ დიდთა

წინაისწარმეტყუელთა უზემთაესო, წინამორბედო და
ნათლისმცემელო უფლისაო იოანე!

კონდაკი 3

ხელთაგან ჰეროდესთა განრინებულო და უდაბნოსა
შინა დამკვიდრებულო, რომელსაცა დაობლებულსა
გზრდიდეს სახიერნი იგი ანგელოზნი, შენდამი,
სულიერისა ხვაერიელისა მის ყანობირისა მიმართ, ხმა-
ვყოფთ ესრეთ: ალილუია.

იკოსი 3

სინანულისა მასწავლელო და ცრემლისა მის
ღმრთივსათნოისა ქადაგო დაუცხრომელი, შენ, ზეცად
მსრბოლსა მას მდინარესა ღმრთისასა და სრბისა შენისა
კეთილად განმასრულებელსა, ესრეთ გმეტყუელებთ:

გიხაროდენ, საწვრთელო ცხოვრებაო;

გიხაროდენ, სამყაროისა პატიოსანო ნელსაცხებელო;

გიხაროდენ, აზნაურო ღმრთისმიერო;

გიხაროდენ, საწინაისწარმეტყუელო მათ წმიდათა
მეცნიერო;

გიხაროდენ, სათნოებაო თითოფერო;

გიხაროდენ, საზეზთმჩენობითა გამობრწყინებულო;

გიხაროდენ, მთავარანგელოზისაგან სახელდებულო;

გიხაროდენ, სულისა მის წმიდისა მადლითა

აღვსებულო;
გიხაროდენ, განდრეკილთა განმმართველო;
გიხაროდენ, ერქუანო საღმრთოო;
გიხაროდენ, წერილსა აღსრულებისა
საცნაურმოფელო;
გიხაროდენ, ჩუენთა ცოდვათა თავმსდებო;
გიხაროდენ, იესუსა მაცხოვნებელისა მის გზისა
განმამზადებელო და ყოველთა მათ დიდთა
წინაისწარმეტყუელთა უზემთაესო, წინამორბედო და
ნათლისმცემელო უფლისაო იოანე!

კონდაკი 4

გახსნად საბელთა მათ ხმალთა იესუსთასა არაოდეს
თავმსდებო, იორდანესა შინა ნათელ ეც უფალსა შენსა,
რამეთუ ესრეთ შუენის შენდა აღსრულებად ყოველი
სიმართლე: ალილუია.

იკოსი 4

ინება რაი ჩუენისა ცხოვრებისათვის ბიწისა
უქონელმან უფალმან ნათლისღებაი, განცხადებითა
თვისითა სამებისა თაყუანისცემაი გუასწავა ჩუენ,
ხოლო შენ, რომელსაცა მამის ხმაი გესმა იესუსათვის
და სული წმიდაი სახითა ტრედისაითა
გამოგიბრწყინდა, საშინელისა ნათლისღებისა მოწამესა
ღმრთივრჩეულსა, ესრეთ გიგალობთ:

გიხაროდენ, ბევრეულთა თავისა მისადრეკელო;
გიხაროდენ, ქრისტეს მოწაფეთა თანაზიარო;
გიხაროდენ, სიხარულო დაუსრულებელო;
გიხაროდენ, აქ ფიცართა ზედა დაწერილო;
გიხაროდენ, ნიშო განმამხნობელო;
გიხაროდენ, მეუდაბნოეთა სახეო მასწავლელო;
გიხაროდენ, ეკლესიისა ლხინებისა მიზეზო;
გიხაროდენ, გონებათა ჩუენთა კეთილმზრახველო;
გიხაროდენ, მტერთა კუეთებასა შინა ღმრთისაგან
განძლიერებულო;
გიხაროდენ, სამკვეთლოსა ზედა მოღებულო ნაწილო
პატიოსანო;
გიხაროდენ, ბელიარისა ლეგეონისა მბრძოლო
ახოვანო;
გიხაროდენ, მოღუაწეო მართლმკუეთელო;
გიხაროდენ, იესუსა მაცხოვნებელისა მის გზისა
განმამზადებელო და ყოველთა მათ დიდთა
წინაისწარმეტყუელთა უზეშთაესო, წინამორბედო და
ნათლისმცემელო უფლისაო იოანე!

კონდაკი 5

მეგვიპტურთა ბილწებათა შემრისხველო და
თვალუხუაგობითა მით ღმრთისმიერთა
საცნაურყოფილო, ყოველთა სათნოებათაგან

შეთხზულსა და სულთა ჩუენთა ცხოველსა საბანელსა დიდების-გმეტყუელებთ შენ: ალილუია.

იკოსი 5

უკანასკნელისა მის ჟამისა მოწევნაო და დაღამებადისა საწუთოისა სთველისა მეფსალმუნეო, უბრალოისა მის სისხლისა თვისისა ნებსით დამთხვევლისა მეტრფესა და წინაისწარმეტყუელსა უსაკუთრესსა ესრეთ გადიდებ:

გიხაროდენ, ყოვლად პატიოსანთა ტაძართა შუენებაო;
გიხაროდენ, ალაგსა მას მარჯუენითსა ღმრთისასა დაგანებულო;

გიხაროდენ, დანთქმადთა ხელისაღმპყრობელო;

გიხაროდენ, სულისა ჩუენისა მწურთელო;

გიხაროდენ, ლოცვაო დაუდუმებელო;

გიხაროდენ, ღმრთისა წმიდაო ებისტოლეო;

გიხაროდენ, მართალთა მათ მშობელთა შენთა ღმრთივკურთხეულო იამავრო;

გიხაროდენ, მართლისა რჩულისა მპყრობელო;

გიხაროდენ, ნაკლულევანთა განმამდიდრებელო;

გიხაროდენ, მუშაკო უცხოფერო;

გიხაროდენ, რამეთუ მორწმუნეთა შენისა ხსენებისა ზატიკი მოგვიგიეს;

გიხაროდენ, რამეთუ ფრთოვან-ქმნილ ხარ ცათა შენა;

გიხაროდენ, იესუსა მაცხოვრებელისა მის გზისა

განმამზადებელი და ყოველთა მათ დიდთა
წინაისწარმეტყუელთა უზემთაესო, წინამორბედო და
ნათლისმცემელი უფლისაო იოანე!

კონდაკი 6

დაუსაბამოისა მის ნათლისა ნესტვო შუენიერო და
უაზნოთა მათ მეფეთა უმჯულოებისა მამხილებელი,
ჯურღმულსა შინა ციხისასა შთაგდებული მზებრ
აღმობრწყინდი განსატფობელად წყუდიადისა მას
საპყრობილისასა: ალილუია.

იკოსი 6

ჰეროდესა და ჰეროდეასა განლალებისა
დამახწეველო, ნაშობთა მათ იქედნეთასა
განმთხეველსა და მძვინვარისა მის ბელიარისა წინაშე
მროკავთაგან თავწარკუეთილსა ღმრთისმეტყუელსა,
ესევითარისა ძლევისა გამოჩინებისათვის შეგასხამთ
ქებასა ამას:

გიხაროდენ, მწიკულევანებათაგან გონებათა ჩუენთა
განმწმენდელო;

გიხაროდენ, ფიცხელთა მით საგრობითა შენითა
გამოჩიენბულო;

გიხაროდენ, უსჯულოებისა მამხილებელი;

გიხაროდენ, ცოდვილთა ძრწოლაო;

გიხაროდენ, ჰეროდეს შიშო დაუცხრომელო;
გიხაროდენ, ჰეროდეადას ჩაკლულის მის სვინდისისა
მქენჯნელო;
გიხაროდენ, სალომეას როკვისა შემრისხველო;
გიხაროდენ, პერობილო და თავწარკუეთილო;
გიხაროდენ, საღმრთოისა განგებულებისა სამჭედურო;
გიხაროდენ, წმიდაო საწამებელო;
გიხაროდენ, რომელი მცნებათა მათ ღმრთისათა
არასადა გარდაჰხედ;
გიხაროდენ, რომელსაცა „გიხაროდენსა“ გახარებენ
ესრეთ;
გიხაროდენ, იესუსა მაცხოვრებელისა მის გზისა
განმამზადებელო და ყოველთა მათ დიდთა
წინაისწარმეტყუელთა უზემთაესო, წინამორბედო და
ნათლისმცემელო უფლისაო იოანე!

კონდაკი 7

ჯოჯოხეთსა შინა ღმრთისამიერითა მით სიხარულითა
შთასრულო, რომელმან მუნცა მიუაჩრდილებელისა
მის ნათლისა გამობრწყინვებაი ჰქადაგე და ქრისტეს
მიმართ გულნი შესვენებულთანი განჰმზადენ, ზეცით
გარდამოღებულსა ხატსა ღმრთისასა გადიდებთ შენ:
ალილოუია.

იკოსი 7

ძუელისა აღთქუმისა განმასრულებელო და ახალისა აღთქუმისა მხმობელო, შენ, სასუმელსა სულიერსა და საზრდელსა გონებითსა, სულთა შინა ჩუენ-თა შენისა შთატევებულისა სამჭედურისა შემწყნარებელნი ესრეთ გიგალობთ:

გიხაროდენ, უსჯულოთაგან ისარცემულო;

გიხაროდენ, ხორცითა მოწყლულო;

გიხაროდენ, სულითა ცხოველო;

გიხაროდენ, ყოვლისა ცთომილებისა მართლმამხილებელო;

გიხაროდენ, უზაკველო ისრაიტელო;

გიხაროდენ ჭურო უმუსრველო;

გიხაროდენ, მმარხუელო, ღუაწლსა შინა შენსა კაცთაგან მიუწთომელო;

გიხაროდენ, მადლითა აღტკინებულო ლამჰარო;

გიხაროდენ, ღმრთისგან განდრეკილთა მათებელო;

გიხაროდენ, უგუნურთაგან დევნილო;

გიხაროდენ, რამეთუ ჩუილადყოფილსა ანგელოზნი გამსახურებდეს;

გიხაროდენ, რამეთუ ღმრთისა ძალნი ობოლქმნულსა მოგართმევდეს სძესა;

გიხაროდენ, იესუსა მაცხოვნებელისა მის გზისა განმამზადებელო და ყოველთა მათ დიდთა

წინაისწარმეტყუელთა უზემთაესო, წინამორბედო და
ნათლისმცემლო უფლისაო იოანე!

კონდაკი 8

ღმრთისაგან აღწონილო და განმართლებელო,
რომელმან ვერცხლი იგი უნივთოი არა მიეც კაცთა
აღნადგინებად, აწ ცათა შინა მოსაყდრეობ ანგელოზთა
თანა: ალილუია.

იკოსი 8

ღუაწლთა მათ შენთაგან განსპეტაკებულო და
სიმაღლეო განუცდელო, ღმრთისამიერსა მას საფასესა
განუპარველსა ქუეყანასა ზედა, რომლისაცა
მცენარეობენ სულიერნი ოქროვანებანი, ესრეთ
გფსალმუნებთ:

გიხაროდენ, სანათო დაუმრეტელო;

გიხაროდენ, ბრძოლასა შინა ახოვნად განწყობილო;

გიხაროდენ, ქუეყანასა ზედა სიხარულევანო;

გიხაროდენ, წინაისწარმეტყუელო მართლმხედველო;

გიხაროდენ, ღმრთისა მაღლითა სახიერქმნილო;

გიხაროდენ, საუნჯეო წარუვალო;

გიხაროდენ, საღმრთოთა მათ წიგნთა

სიბრძნისმეტყუელო;

გიხაროდენ, გონებითა თუალთა სიწრფოებაო;

გიხაროდენ, ტაძარო განბრწყინებულო;
გიხაროდენ, სულიერთა მდელოთა მომფუტკრებელო;
გიხაროდენ, რამეთუ ხოტბათა შეგასხმენ ქერობინნი;
გიხაროდენ, რამეთუ გიქებენ სრბასა სერაბინნი;
გიხაროდენ, იესუსა მაცხოვნებელისა მის გზისა
განმამზადებელო და ყოველთა მათ დიდთა
წინაისწარმეტყუელთა უზემთაესო, წინამორბედო და
ნათლისმცემელო უფლისაო იოანე!

კონდაკი 9

ხმოვანებაო განსაკრძალველო და გონებათა ჩუენთა
მღვიძარებად მომყუანებელო, შენ, ღმრთისმიერთა
მით მაღლითა აღვსებულსა ტაკუკსა სარწმუნოებისასა,
მაცხოვნებელისა მის სინანულისა მაძიებელნი,
ვითარცა ღმრთისად მიმყუანებელსა, მიგემთხვევით:
ალილუია.

იკოსი 9

საღმრთოთა მათ ენათა მეცნიერო და
მართლსიტყუიერებისა მწურთელო ხელოვანო, შენ,
მოლუაწებისა ზოსტერთა შემორტყმულსა და ხორცთა
შუებისა უცოდნელსა, შენითა მეოხებითა
ხელაღპყრობილნი და ვნებათა მათგან დანთქმადთა
განრინებულნი ესრეთ გადიდებთ:

გიხაროდენ, მოწამებისა სრულებათ;
გიხაროდენ, სიწმიდისა განცხადებათ;
გიხაროდენ, ფრიადისა სარწმუნოებისა მომზევებათ;
გიხაროდენ, კეთილმუშაკობისა განჩინებათ;
გიხაროდენ, ალაგო ვენახოანო;
გიხაროდენ, ვენახოანისა მის კეთილსურნელებათ;
გიხაროდენ, ტევანთა მისთა სიტკბოებათ;
გიხაროდენ, მოწესეო განსაკრთომელო;
გიხაროდენ, მოლუაწებითა დამაშვრალო;
გიხაროდენ, დაშვრომითა მით აღსუბუქებულო;
გიხაროდენ, დაბრმობილთაგან მოძულეებულო;
გიხაროდენ, რამეთუ შენგან გვისწავიეს ცათა მიმართ
თუალთა აღხუმაი;
გიხაროდენ, იესუისა მაცხოვრებელისა მის გზისა
განმამზადებელო და ყოველთა მათ დიდთა
წინაისწარმეტყუელთა უზეშთაესო, წინამორბედო და
ნათლისმცემელო უფლისაო იოანე!

კონდაკი 10

ემბაზო ცისკროანო და ღმრთისმიერთა მით მაღლითა
მირონცხებულო, რომელი სოფლიოისა ამის
განხეწნადთა საქმეთა თანაწარხედ, შენ, ღმრთისა
წიალსა შინა ანგელოზთა მიერ წარყუანებულსა,
დიდებისგმეტყუელებთ: აღილუია.

იკოსი 10

ღვთივსათნოსა სულისა მდულარებაო, რომლისაცა სახელი გვიცნობიეს ქრისტეანთა თესლითითესლამდე, შენისა მიურულეებელისა ცხორებისა ხილვითა განკრთომილნი, ხმავეყოფთ შენდა მომართ ესრეთ:

გიხაროდენ, ბოროტისა დამახრწუელო;

გიხაროდენ, ღმრთისა მიმართ აღტრფობილთა გულთა მედღესასწაულო;

გიხაროდენ, მზუაობართა დამამდაბლებელო;

გიხაროდენ, მდაბალთა აღამმალლებელო;

გიხაროდენ, დაუგალისა მის მზისა მხმობელო;

გიხაროდენ, საცნობელთა ჩუენთა სასუფეველსა მიმაახლებელო;

გიხაროდენ, აღსასრულისა მის შენისა მდუმრიად მიმთუალველო;

გიხაროდენ, ზეციურსა მას ქალაქსა მიცვალებულო;

გიხაროდენ, ღმრთისმხდომთა დამთრგუნველო;

გიხაროდენ, ჯერკუალთა განმაგდებელო;

გიხაროდენ, რომელმანცა ჯოჯოხეთი მოიქადაგე;

გიხაროდენ, რომელმანცა პყრობილთა ჯოჯოხეთისათა ახარე მაცხოვრისა ხორცითა გამობრწყინვებაი;

გიხაროდენ, იესუსა მაცხოვნებელისა მის გზისა განმამზადებელო და ყოველთა მათ დიდთა

წინაისწარმეტყუელთა უზემთაესო, წინამორბედო და
ნათლისმცემელო უფლისაო იოანე!

კონდაკი 11

სიტყუიერთა მათ ცხოვართა მოძლუარსა ახოვანსა,
რომელმანცა განსაკვირველითა მით მოლუაწეობითა
თვისითა ყოველი ქრისტიანეთა გულნი მოიმძევლა,
ხმითა მაღლითა ვულადადოთ, მორწმუნენო:
აღილუია.

იკოსი 11

ყოველთა წმიდათა თანაშენაწევრებულო და
საცთაურთაგან ყინულქმნილთა გულთა ჩუენთა
განსატრფობელად აღნთებულო ცეცხლო
ღმრთეებრივო, შე-ნითა სიახლოვითა განხურვებულნი
ესრეთ გიგალობთ:

გიხაროდენ, წადილო ღმრთეებრივო;

გიხაროდენ, შეურვებულთა ნუგეშინისმცემელო;

გიხაროდენ, ჭურო უვრცელესო, ღმრთისაგან
აღმოვსებულო;

გიხაროდენ, სრბისა შენისა მოწამეობითა
განმასრულებელო;

გიხაროდენ, ღმრთისა აღლესულო მახვილო;

გიხაროდენ, ბელიარისა შინაგან განწონილო ქეიბურო;

გიხაროდენ, ჩუენდა სისახრულად მოსრულო;
გიხაროდენ, ყოვლისა დღესასწაულისა
წინასიტყუაობაო;
გიხაროდენ, ნაკლულევანთა საქმეთა ჩუენტა
კეთილგანმასრულებლო;
გიხაროდენ, რამეთუ შეგიტკბო შენ ქრისტემან;
გიხაროდენ, რომელიცა ღმრთისა შეწევნითა უძლეველ
იქმენ;
გიხაროდენ, რომელიცა მოწამებითა მიიცვალე ამიერ
ქუეყანით;
გიხაროდენ, იესუსა მაცხოვრებელისა მის გზისა
განმამზადებლო და ყოველთა მათ დიდთა
წინაისწარმეტყუელთა უზემთაესო, წინამორბედო და
ნათლისმცემლო უფლისაო იოანე!

კონდაკი 12

ყოფადთა მესიტყუეო, რომელი პირველთა მათ
საღმრთოთა წინაისწარმეტყუელთა შეეძინე, უგბილთა
მორჩილებად მომყუანებელსა და უნანელთა გზათა
მათ დრკულთა განმმართუელსა, გადიდებთ შენ:
ალილუია.

იკოსი 12

რომელმანცა თვისითა მადლითა და
კაცთმოყუარებითა მაცხოვრებელი ესე ნათლისღებაი

მოგუანიჭა ჩუენ, მანცა გუასწავა უბადოთა ამათ
მადლობაი ღმრთისა წმიდათაი ესრეთ:

გიხაროდენ, ახლისა აღთქუმისა მესიტყუეო;

გიხაროდენ, ცათა სასუფევლისა მხმობელო
უპირველესო;

გიხაროდენ, ზეცისა სიბრძნითა მიწისა
განმაშუენებელო;

გიხაროდენ, მამისა მაქებელო;

გიხაროდენ, ძისა მადიდებელო;

გიხაროდენ, სულისა წმიდისა მგალობელო;

გიხაროდენ, ღმრთისმშობლისა შევედრებულო;

გიხაროდენ, პირველთა მათ დიდთა მოლუაწეთა
თანამოსაგრეო;

გიხაროდენ, ყოფათდა მოლუაწეთა მაკურთხეველო;

გიხაროდენ, მოქენეთა შენთა საზრდელო
ღმრთეებრივო;

გიხაროდენ, რამეთუ სრულჰყო ღმერთმან, რასაცა შენ
წინაისწარ-ღაღადებდი;

გიხაროდენ, რამეთუ შეესმა ხადილისა შენისაი
ღმერთსა სიმართლისა შენისასა;

გიხაროდენ, იესუსა მაცხოვნებელისა მის გზისა
განმამზადებელო და ყოველთა მათ დიდთა

წინაისწარმეტყუელთა უზეშთაესო, წინამორბედო და
ნათლისმცემელო უფლისაო იოანე!

კონდაკი 13

ჰოი, ქრისტეს გამოჩინებისა წინამესიტყუეო და ღმრთისა ქებითა აღსრულებულო, რომელი უნანელთა სულთა ამათ ჩუენთა ზედა ცრემლით, ვითარცა ღმრთისა საყდრისა მგალობელმან, მოგვმადლე ლოცვითა მით შენითა სინანული იგი მაცხოვრებელი, რაითა შემოქმედასა მას ყოველთასა დაგებულნი და შეწყნარებულნი, დაუცხრომელსა მას გალობასა აღვაველენდეთ ღმრთისა მიმართ: ალილუია.

(ეს კონდაკი ითქმის 3-გ ზის, ხოლო შემდეგ იკოსი 1 და კონდაკი 1).

ლოცვა

ჰოი, ეკლესიისა სუეტო შეუძვრელო და ქრისტეანთა სიქადულო, ვითარცა ყოველთა ღაღადისისა შემწირველმან შეიწყნარე ჩუენიცა ესე ვედრებაი და მეოხ გვყავ ჩუენ, რაითა ყოვლად სახიერმან მეუფემან შეიწყალოს ღმრთივდაცული ერი ჩუენი და მეუფება მისი, უწმიდესი და უნეტარესი, სრულიად საქართველოს კათალიკოს-პატრიარქი და მცხეთათბილისის მთავარეპისკოპოსი და ბიჭვინთისა და ცხუმ-აფხაზეთის მიტროპოლიტი, დიდი მეუფე, მამაი ჩუენი ილია, ყოვლად სამღუდელონი მოტროპოლიტნი, მთავარეპისკოპოსნი და

ეპისკოპოსნი, პატროსანნი მღუდელნი, ქრისტეს მიერ დიაკონნი, ყოველნი სამონაზვნო წესნი და ყოველნი მართლმადიდებელნი ქრისტეანენი.

ჰოი, უღუაწთა ამათ გონებათა ჩუენთა მომმუშაკებელო და ერქუანითა სინანულისათა გულთა შინა მორწმუნეთათა შთაბეჭდულო კუალო ღმრთისმიერო, ღმრთისა საყდრისა მჭვრეტელმან დაბრმობილნი თუალნი ეგე სულისანი ცათა მიმართ აღგვიხილენ, რაითა მაცხოვრებელსა მას ნათლისღებასა მიმთხუეულნი და ნათლისღებისა მის ბეჭდით ნიშანდებულნი და მისითა მადლითა დღეყოველ ცხორებულნი, ჩუენცა შენ თანა ვუგალობდეთ ნათლისმცემელად თვისად გამომაჩინებელსა შენსა ქრისტესა ღმერთსა, რომელსა შუენის დიდება, პატივი და თაყუანისცემა თანა დაუსაბამოით მამით თვისით და ყოვლადწმიდით, სახიერით და ცხოველისმოფელოთ სულით წმიდითურთ, აწ და მარადის და უკუნითი უკუნისამდე, ამინ.

